



Sesida dals

Communitgà ils

Protocol nr.

7 da matg 2019

9 da matg 2019

341

Incumbensa da fracziun da la PPS

concernent il scleriment da la dimensiun probabla dal donn da las cunvegns da
submitiun

Resposta da la regenza

Pervia dal mantegniment da las structures intenziunà e pervia da la retegnientscha envers stimul d'innovaziun chaschunan cunvegns da submitiun regularmain pretschs pli auts. Perquai fan ellas donn a l'economia publica e vegnan chastiadas da la cumissiun federala da concurrenza (CUMCO). L'autezza da la multa sa drizza tenor la svieuta realisada sco er tenor la durada e tenor la grevizza dal cumportament inadmissibel. In donn ch'ils patruns han subì n'examinescha la CUMCO per regla betg en sias proceduras (cf. las disposiziuns da la CUMCO concernent ils cartels da construcziun en ils chantuns Turtg, Argovia, Son Gagl, Sviz, Grischun u Berna).

Tenor il dretg vertent èsi difficil da far valair pretensiuns dal dretg civil da cartel. Quai è er collià cun malsegirezzas giuridicas considerablas. Il dretg civil da cartel n'è strusch svilupà en Svizra ed ina pratica giudiziala segirada n'exista betg. Tuttina è la scienza da l'opiniun ch'ils incumbensaders publics èn da princip legitimads da far valair dretgs d'indemnisaziun. Ina cas da precedenza manca però anc oz.

En enconuschientscha da la lunga durada da proceduras dal dretg da cartel sco er per mantegnair ses dretgs d'indemnisaziun ha il chantun pretendì – gia durant las investigaziuns currentas da la CUMCO – da las 46 partidas pertutgadas da renunziar ad objecziuns da surannaziun. Per in'analisa tenor il dretg d'indemnisaziun dals projects chantunals ch'èn pertutgads da las cunvegns èsi essenzial d'avair ina invista cumpletta da las actas da procedura da la CUMCO. Pervia da quai ha il chantun fatg las dumondas da survegnir invista da las actas da tut las proceduras da la CUMCO che al pertutgan. Quellas dumondas n'èn anc betg giuditgadas cun vigor legala resp. sistidas actualmain. Per survegnir ina invista cumplexsiva da las actas en il cas "Val Müstair" ha il chantun fatg in recurs tar il tribunal administrativ federal cunter ina disposiziun da la CUMCO. Pendent davant il tribunal federal è ultra da quai in cas sumegliant dal chantun Argovia. Questas sentenzias vegnan ad esser pregiudizialas per l'ulteriur tractament da dumondas d'invista d'actas da la CUMCO.

Tar il punct 1: Il chantun ha examinà quels projects ch'èn identifitgabels per el – sco partida betg pertutgada da la procedura – or da las disposiziuns vertentas da la CUMCO e senza ch'il dretg d'invista da las actas al sto vegnir concedì. Quests totalmain 17 projects, ch'èn vegnids realisads en l'Engiadina bassa ed en la Val Müstair, èn vegnids surdads tranter ils onns 2004 e 2012. Ils documents ch'èn avant maun anc oz cumprovan che las offertas inoltradas èn vegnidas examinadas e cumparegliadas da quel temp tenor il standard e confruntadas cun in eventual

preventiv dals custs. En vista a las constataziuns da la CUMCO ston ins oz partir dal fatg ch'igl è vegnida tangada la concorrenza efficazia giavischada tranter ils offerents. Pervia da quai na poi betg vegnir exclus ch'il chantun ha subì in donn finanziel. Igl è però difficil da giuditgar retroactivamain, sch'il cumportament d'offerta ha correspundì al pretsch da martgà regional ipotetic da quella giada. La controlla posteriura dals 17 cas ha mussà che offertas, che interpresas da construcziun che n'èn betg pertutgadas da l'examinaziun da la CUMCO, han inoltrà per singuls projects da construcziun, èn economicamain main favuraivlas. Per giuditgar il donn pussaivel dovra il chantun ulteriuras enconuschientschas dals fatgs p.ex. tras l'invista da las actas, cun la cooperaziun da las interpresas u tras ulteriuras infurmaziuns. Tar l'analisa currenta dals cas vegn il chantun sustegnì d'experts extrachantunals. En il rom da l'optimaziun dals andaments da surdada ha il chantun concludì d'introducì in monitoring dals pretschs a lunga vista che vegn realisà cun agid d'in program da computer. Uschia vegni ad esser pussaivel da percepir meglier musters da cumportament da cartel en cas da surdadas futuras. Ins po supponer che l'implementaziun prevista da quest instrument da screening sviluppà da nov vegn a chaschunar in effect preventiv supplementar.

Tar il punct 2: Il chantun stat en in stretg contact cun singuls incumbensaders publics (p.ex. Viafier retica, vischnancas) ed è er vinavant pront da sustegnair quels en moda consultativa cun ses post da submissiun, sche l'interess è avant maun. Il medem mument stoi vegnir constatà ch'els han per part gia fatg scleriments areguard in donn eventual. La finala sto mintga organisaziun decider en atgna cumpetenza, sch'ella vul far valair ses eventuels dretgs.

Tar il punct 3: Per la stad ha la CUMCO annunzià ina decisiun "Construcziun da vias en tut il chantun". Tenor la CUMCO è quella d'ina dimensiun pli gronda. Dapli indicaziuns na fa ella betg. Suentar che la CUMCO ha prendì sia decisiun, vegn il chantun puspè a dumandar il dretg d'invista da las actas per pudair examinar eventuels pass da dretg da submissiun e da dretg civil. Er qua existan las difficultads giuridicas descrittas en punct 1. Parallelamain a la procedura currenta da la CUMCO fa il chantun atgnas examinaziuns. In solo chantunal en questa chausa n'è però betg raschunaivel, perquai che la CUMCO ha auters meds finansials a disposiziun per retschertgar ils fatgs. La decisiun annunziata vegn però probablamain ad avair consequenzas per l'ulteriur proceder tranter il chantun e las interpresas.

Sin basa da questas explicaziuns propona la regenza al cussegl grond d'approvar l'incumbensa qua avant maun concernent ils puncts 1 e 3 e da la refusar concernent il punct 2.



En num da la Regenza

Il president:

Il chancelier:

Dr. Jon Domenic Parolini

Daniel Spadin